


Majourau Canounge GEORGE

FELIBRE DE L'AUTAR

Mi Rèire - Vendèmio

Belugueto Radiero



EDITIONS DE LA MÉDITERRANÉE

CANOUNGE

Quouro m'aganto, lou vieioungé,
Vaqui que me noumon canoungé,
Aguènt, proche de quaranto an,
Oubra pèr Diéu e li crestian!
Pamens sèmpre siéu lou meme ome,
S'autramen ai que l'on me nome.
 Aièr, umble pichot curat,
 D'un titre vuei, siéu ounoura.
 Coume uno nouvello neissènço,
 Me fai esto recounèissènço.
Se me disien: — De qu'as de mai?
 — Lou dre de cargo ou camai
Rouge sus negre, au poun d'espino,
Bourda de blanc, mai pas d'ermino,
 Simplamen de pèu de lapin
 Sus un subre-pelis di fin;
 Pourta barreto dóu flot rouge
 Riscant pas de rèndre ferouge;
 Ribau blu flouca d'uno crous
 Especialo e de bon goust;
 Agué, dins la grand Baselico,
 Mesclant ma voues is angelico,
 Un sèti, que lis enemi
Dison qu'es pèr pousqué dourmi
Dóu tèms que se canto o se prego,
 Qu'un ouratour seguis sa rego...
Pièi, quand Mounsegnoù es soulet,
 Ié rèndre tout eisa, moulet.
S'es pas l'àbi que fai lou moungé,
Fai pas, nimai, lou bon canoungé:
 Ai forçò mai l'óubligacioun
 De faire ounour à mi founcioun.
 Pèr acò faire, Diéu m'ajude,
 Car lou santisme sèmpre es rude!

Outobre 1962,

PANEGIRI MANCA

Dins uno acampado noumbrouso,
lou panegiri d'Urban cinq
pèr un saberu de Toulouso
aviéu d'ausi sus un couissin.
Urous d'avanco d'un regale
deguère subran descanta
e faire moun dòu d'aquest chale,
tre que lou vouguère escouta.
La machino dòu naut-parlaire
nous larguè d'abord quauqui tron
pièi s'apasimè, mai dins l'aire
soun debana noun èro bon.
Venié-ti d'aquéu que parlavo
trop luen, trop proche dòu micro?...
Venié-ti di vouto councavo
que resounavon cop sus cop?...
Toujour ei qu'au bout d'un quart d'ouro,
nautre, qu'ausissan mau parié,
se demandavian quouro, quouro
lou reboulimen finirié!
D'ùni, vesian, sourtien si mostro;
D'ùni s'endourmien, alassa;
D'ùni, revassejant i rostro,
s'esvadavon dins lou passat.
Iéu, me disiéu: Quente daumage
aquest travai e tèms perdu!
L'avisamen, mai pas d'usage,
un grand service aurié rendu!
O! mai d'uno ouro de reloge
l'ouratour debanè soun fiéu;
lou grand discours digne d'elogie
coume forço autre lou perdiéu!
Quand parlaras, tu, fugues sage,
me redisiéu à tout moumen;
de l'ausido assuro-te n'en,
car, enfin, lou pu bèu passage
fuguè quand coumprenguère: — Amen!

Au Palais di Papo,
30 de setembre 1962.

À L'OUSPICE

Garda de vièi es pas tout un
Ensèn acampa dins de salo!
Lis ome, se saup, fan de fum,
Di femo se sènt lou prefum:
Rèn de tout acò vous regalo!

Sougnà lis ome, es mai eisa,
Soun pas meichant coume de femo.
Tèms passa, soun mens empesa.
Mai, aro, soun mens empesa.
N'ai pas vist n'aguènt de lagremo.

Lou meiour di counsouladou
Es, pèr éli, quauco boutiho
Que tenon dins soun fouradou,
Inchaiènt de l'avenidou,
Estènt soubro de sa famiho.

Lou miés, pèr li vèire countènt,
Es de li vèire au refeitòri;
Aqui, meme s'an que dos dènt,
Tambèn prenon soun alimen
Avans la pauso au dourmitòri.

Lis amatour de “soun“ journau,
Tre que fai jour, s'en van lou querre.
An ges d'abounamen annau,
Mai l'estimon coume uno nau
Provo d'uno santa de ferre.

N'i'a que soun pas propre, se saup,
Ounte noun fau escampon d'aigo...
Escupisson ounte noun fau...
Avèn d'escusa si defaut:
Soun vièi e pièi, soun pas bélulaigo!

N'i'a que, vesti, soun pas trop bèu
E que se trufon de la modo:
Braio loungarudo, auripèu,

Di sabato enjusqu'au capèu
Cercon qu'uno vido coumodo.

Carga de grèvo infiermita,
N'i'a que lou malur lis escrancos:
 Lis avugle despoutenta,
 Sourd, panard, bèn que retrata
Li qu'uno cambo i'es de manco.

I'a peréu d'àutris endeca
Que soun pietadous e de plagne:
 Li pàuri mié-paralisa,
 Li rumatisant qu'an enca
Bèn sa tèsto. D'éli me lagne.

N'i'a proun que se van souleia
E reluca li gènt que passon,
 Acò li distrai, peréu n'i'a
Qu'em'un triciéucle endemounia,
Qu'emé de crosso se trinasson.

Lis ome soun gaire devot,
Mai freirejon, soun servicable.
 Resigna, lou soun quàsi trop,
 An ges d'ambicioun ni de vot:
Saran-ti o predo dóu diable?...

Li femo an rèn d'especiau
Senoun proun cop de marideso.
La despaciènci es soun grand mau.
 An ni vin, ni lou cachimbau,
 De se teni bèn an pereso.

Aquéli que tenon lou lié
Esperon que vèngue soun ouro,
 I'an leva raubo emai soulié,
 I'atubaran dous candelié,
Quouro aurans de parti, mai quouro?...

Soun oumournié vendra lèu-lèu
Pèr li vougne di sàntis òli
 Après li preguiero e belèu
La Coumunioun, coume un soulèu,
 Se podon faire aquéu regòli.

D'ùni que i'a fan que ploura
E d'ùni que i'a fan que rire.
An plus sa tèsto! Quand vendra,
Sa mort, Diéu li deliéurara:
Perdre lou sèn, acò's lou pire!

D'ùni, li fau faire manja,
Car mouririen estènt pas lèri.
Se voulias vous ié carreja
Pèr vèire lis endaumaja,
Crebon lou cor ' tant de misèri!

Urousamen qu'à soun entour
Travaion e vihon de Sorre.
Ié fan tout ço que fau, toujour,
Pèr-fes de niue coume de jour,
La fin di gènt noun ié fai orre.

Si merite, Diéu li counèis.
Esperon d'Eu sa recoumpènso.
Fan soun obro e ié rèsto pièi
D'estre fidèlo i sànti lèi
E sounado sènso cregnènço.

Mai soun raro e bessai vendra
Lou tèms que i'aura plus de mourgo.
Soun devouamen quau l'aura?...
E coume l'obro se fara?...
D'apelado, an d'acò di dourgo!

Pèr bonur tóuti li matin,
E lou vèspre encaro, à soun ouro,
Dins sa capello, es grand festin
Pèr soun amo e pèr soun destin.
Deguno manco, macastin!
Pèr éli, n'i'a ges de meiouro!

Es un mounde, aquéu grand oustau.
L'amenistratour, l'ecounome,
Saup qu'es quasimen l'espitau,
Viho sus tout, coume un catau,
Tambèn se dis qu'es un bon ome!

L'ESCOUBIHAIRE

Es en esperant lou pedoun
Qu'amirère un escoubihaire.
Lou vesiéu quàsi d'escoundoun,
Ansin ou tèms duravo gaire.

De l'Ouspice èro la grand'court
Ounte avien creissu sièis platano;
Se despampavon nuech e jour
De rouvi, sout la tramountano.

L'ome èro forço atrivali,
Tóuti li jour fasié soun obro,
D'une escoubasso èro muni
Pièi d'un carretoun de manobro.

Estènt sourd, charravo en degun,
Travaiaavo emé counsciènci,
Sa pipò i dènt fasié de fum,
Soun capèu mòu curbié sa sciènci.

Pacientamen, sènso cala,
Fin-que la court fuguèsse neto
Anavo plan d'eici-d'eila
Ges de brut, ges de cansouneto!

Lou vènt, de-fes, couchavo luen,
Luen d'eu e dóu coustat countràri
Un vòu de fueio qu'emé suen
Rambaiavo e pourtavo en càrri.

Veguère ansin, un cop de mai,
Que leu travai e la paciènci
Soun lou secrèt d'avé de biais,
Soun pèr tóuti la grande sciènci.

L'OME DÓU TRICIÉUCLE

À l'Ouspice, avèn un fada
Qu'avans lou jour e si coulègo,
Rejoun soun sèti, just farda,
E vai soulet sus lou bardat
Pèr mira tout çò au boulego.

E zóu! e zóu! fai de camin
En aciounant sa mecanico.
Quente plesi, quente destin
I'arribo ansin, cade matin?...
Sara pas badau quau l'esplico!

Pren just lou tèms de mastega
E zóu! mai! lou vaqui qu'encambo
Soun óutis que s'es fa paga
Pèr se distraire e trafega
Despièi qu'a de marrìdi cambo.

Li gènt que, sus lou trepadou,
S'entramblon de-fes à si rodo
Dison rèn dóu carrejadou,
Penson que n'aurien soun sadou
De barrula d'aquelo modo!

Iéu, l'estùdie de bèu moumen:
Es-ti que l'ome amo la vido
Que counsisto en de mouvemen?...
Bado? Envejo? Es amusamen?...
Mai res, à sauta, lou counvido

MA SOUTANO

Sian quàuquis un encaro à pas quita la raubo
Que nous marco au mitan dóu mounde ounte se raubo.

Perqué dounc pas se metre à la modo dóu jour?
De tóuti li resoun, vuei, n'en faren lou tour.
Ça qu'es permés, se saup, jamai es perentòri.
Poudès, se vous plais pas, lou leissa pèr l'istòri.
Res vous forço, sias libre e, sariéu-ti darnié,
Iéu, garda ma soutano e noun siué móutounié.

Me rapelle tambèn qu'emé ceremounìo
Davans Diéu e parènt en bello letanìo
Reçaupère l'abit que devian ounoura
Dins un mounde de quau nous tenié separa.
Ero óujèt d'ahiranço o d'ardènto coulèro,
Viésti dóu curat d'Ars e d'óumournié de guerro,
De prèire meritous, dins li tèms abourri
Ounte de rouginas lis aurien agarri.

Mai óujèt de respèt, sèmpre, me rende comte,
De la port di meiour, n'en fariéu lou raconte,
Que saludon enca li menistre de Diéu,
Lis abordon, de-fes, e d'un biais agradiéu
Pèr ié charra. De que? De l'ouro de la messo,
Pèr un rensignamen, pèr un secours que presso...

En tutto leiauta, veguen dounc, quatecant,
Li proufié que l'on a d'estre plus coume avans:
Dóu vièsti « clergyman diguen lis avantage:
Mai de coumoudita pèr mountagno, en vouiage,
Sian d'accord e, de mai, èstre plus soustira,
Passa sènso èstre vist dins lou mounde afeira.

E pièi pas tant moustra di soutano li taco,
Car, sus lou gris, pas tant la pousso se i'estaco.
Dins nòsti vilajoun, ges de necessita
Toucant lou sant abit, nous fasié lou quita.
Deguno, acò se saup, óubligavo lou prèire,
Es emé de regrès qu'en civil ou fau vèire.

Encaro lou lesi de pousqué travaia
Is obro d'un mestié, ço qu'es pas counseia.
Se pòu, piousamen, celebra sèns soutano,
L'abit sauvo jamai un prèire que se dano
E la pichoto crous, au revès dóu vestoun,
Dèu designa dóu bon un prèire nouvèu doun.
Vaqui, moun car leitour, li pèr emai li contro,
Vaqui perqué toujour lou negre se rescontro.
Prenguère a soutano e noun la guitarai
Pas memo quouro, enfin, vers Diéu m'enagnarai.

Vau-Rias, 6 d'avoust 1969.

LA GIROUETO

Sus lou domo de la capello,
Vese un drapèu de ferre vièi
Que viro i vènt e mostro en bello
Quau es que boufo e se fai rèi.

Fai un brut qu'es bèn couneissable
Quand brando à l'aire chanjadis;
Es famihié, noun ahissable,
Just manco d'òli, m'es avis!

S'es de l'Uba, fai fre que jalo,
N'avèn pèr quàuqui marrit jour;
S'es dóu Miejour, en de rafalo,
Nous adus la plueio toujour.

S'es dóu Pounènt, es mai la plueio
Que, lèu o tard, bagnara tout;
Raramen lou Levant enueio
E, resta siau, vèn gaire au bout.

S'es entre dous, tant pièi aribo:
Viro, lou vènt; calo, lou vènt!
Siéu miés dedins que sus la ribo
O sus l'aigo ounte l'on se tèn.

Quand boulego plus, lou pouèto,
Prouficho e pènso is elemen:
Forço gènt soun de giroueto!
La vido es dins lou mouvemen,
De-fes, eisijo un chanjamen!

5 de juin 1969.

LA REVÓUTO DI PEDOUN

1

Aro, ami, dins nòsti vilo,
La rèino es l'automoubilo.
Lou pedoun dèu s'escarta,
Sus éu a priourita.

2

Se fai tout pèr li machino
Que baion la petachino
Quouro voulès travessa:
I'a d'endré: — Fau ié passa!

3

Se la levado es mai largo
Pèr lou moustre que se fargo,
Sus li trepadou estré,
Sian quicha coume au destré.

4

Di café i'a li terrasso
Qu'on quàsi plus ges de plaço

E souvènt i'a d'escoulan
Que butas, même anant plan.

5

Li marchand qu'on d'eventàri
Mancon pas d'avé d'auvàri:
Es demeni soun taulié
D'estofo vo de soulié.

6

I'a que lou davans di banco,
Aqui lou large noun manco,
S'avès que faire d'argènt,
Anas-ié, se plaço bèn.

7

An lou dre coume lis autre,
Li chin, sourti de si pautre,
De courre emai de pissá
Contro tout ço qu'es dreissa.

8

De grand pargue s'establisson
Pèr gara li que boumbisson;
Soun riche, an de que paga
Sènso n'estre estoumaga.

9

Se dis que i'aura revòuto
Di pedoun que, mànti vòuto,
Soun trop esta mespresa
Dins soun trafé mal eisa.

10

Se lou pedoun manifèsto,
Iéu, sarai d'aquelo fèsto,
 Car avèn de circula
Sènso trop, trop carcula.

11

Auran besoun, nòsti vilou,
Pèr avé la pas tranquilo,
 D'enebi'quéli moutour
Que brusisson nuech e jour.

12

Emai qu'empudisson l'aire
Dins noste entour e terraire:
 En foro, an d'estre parga
Pèr rèn o s'an de paga.

21 d'abriéu 69.

EISAGERACIOUN

1

Sus li trepadou di vilou,
Ounte vanegon li gënt,
N'i'a que fan leva la bilo
Talamen soun endigènt
D'aquelo vertu tranquilo
Que nouman l'èime, lou sèn.

2

En vouguènt segui la modo,
Segur qu'eisagèron trop,
Cercant li causo coumodo
E ridiculo proun cop.
Ansin se buto à la rodo
Vers un prougrès sènso co.

3

N'i'a qu'an aléugi sa tèsto
Di péu qu'èron de sesoun;
Emé lou pau que ié rèsto
Vous sèmblon just de garçoun:
Es un flèu aquelo pèsto
Que mespreso li frisoun.

4

Li jovènt fan lou countràri:
Se laisson crèisse li péu
D'un biais estraourdinàri;
Emé li favourit siéu,
Retraison d'abouticàri
O de noutàri tout viéu.

5

De mai, cargon reguingoto
Coume antan li magistrat
E calignon, fan la voto,
Pièi escàmbion de retra
Emé de chato mignoto
Dins l'espèro dóu countrat.

6

Tras que fièr d'estre is escolo,
Faran d'ome de burèu
Coumtant chifro emai bricolo

D'un èr triste e sounjarèu,
Car, dins li vau, sus li colo,
D'estrangié soun pèr parèu.

7

N'i'a qu'an envisca si labro
D'un rouge pas naturau:
Li femo an d'acò di cabro:
 Lis atiro lou courau.
S'an idèio que nous abro,
Soun vejaire es inmourau.

8

A sis iue, de damisello
Bouton de negre, de blu;
Ansin se fan de parpello
 Pèr coungreia de belu:
— Pàuri nèsci! Noun sias bello
Quand la naturo i'es plus!

9

D'ùni moustron si cueisseto
 O si bèu tros de jamboun
De tau biais que vous inquieto
 Soun just mini-coutihoun.
 Se vèi un bord de braieto
Pèr tapa soun quiéu redoun.

10

S'amo miés crousa de chato,
Digno, gaio d'estre en flour
 Emé de Dono escarlato
 Sinjant lis ome en belour,
Aguènt mes si cambo mato
Dins de fourrèu de coulour.

11

A si pèd, n'i'a qu'an d'agui
I taloun de si soulié
Sènso cregne la pòu bluio
De plus camina parié.
De vedèu, de pèu de luio,
Marchon, sauton qu'es foulié!

12

E, dis oungle, que n'en dire
Quand longo e vernido soun?
Lou Creatour dèu n'en rire:
Anant contro sa façoun,
Li femeto, acò's lou pire!
Sèmblon ié faire leiçoun.

13

Pense à Charloun, ome ounèste,
Qu'un jour s'ero escalustra
D'avé vist e lèste, lèste!
Un fin bouteu esmara!
Es-ti pudour que ié preste?
Que vuei manco, l'ai moustra!

14

I dameto em'i fihasso
Dise à guiso d'adessias:
— Quouro quaucun vous despasso,
Escoutas-bèn, escoutas
Lou fin mot que se recasso:
— Imbecilo! Ah! vo! lou sias!

“CREISSLÈS E MULTIPLICAS“

La Genèsi, 1-28

Fernisse, quouro vese un parèu que s'espaço:
Eu, coume un amourous galant, abile, en casso;
 Elo, enlaçant abord la taio dóu jouvènt,
Tóuti dous s'enfioucant d'aquel urous moumen.
— Ai! Ai! Aviso-te! voudriéu dire à la folo,
 Dóu fringant que t'amato e de si faribolo!

Coume, despièi toujour, l'ome cerco la femo
Que bèn siegue à soun goust, s'es pas toujour la memo,
 De soun coustat, a femo aqueso à soun desi,
Quouro crèis atrouba, de mai qu'un viéu plesi,
 L'ome segur e fort entrevist dins si sounge,
La sousto e lou soustèn, d'aro enjusqu'au vieioungue.

Pèr uno forço tuclo e l'istint que li buto,
Cercon de s'aparia, tout ris à la debuto.
 Après li sentimen, lou cors es pessuga...
Pèr èstre urous en plen sarien lest à paga.
D'un amour counsouma quau vèi li counsequènci?
 L'urgènci de la car ié masco la demènci!

D'aquelo uniooun, pamens, un enfantoun pòu naisse:
Nóu mes après, de fèt, la maire a de lou paisse:
 Es la car de sa car e lis os de sis os.
 Aura-ti de parènt pèr l'abari dispost?...
Alor recouneiran, mai à l'ounour dóu mounde,
Lou fru de soun amour, sèns que res s'escounde.

Counvèn, pèr faire acò, que i'ague l'entendudo,
 Un parèu que noun vòu espera la vengudo
 Pèr se desbarrassa dóu fais d'aquel enfant
 Sus li bras dóu Gouvèr e dóu pople pagant.
Quouro uno maire, ai! las! e soun ome s'esbignon,
 Aquelo soulucioun fai que li gènt s'endignon.

Ome, femo, pensas, quouro la car reclamo,
 Que noun fau dire sebo à la bèsti que bramo
 Sèns prevèire lou risco emai l'orre destin

De trasmetre la vido à-n-un paure mesquin
Que sèmpre soufrira d'estre esta, cauto-cauto,
Quita coume un bastard; acò pèr vosto fauto!

En tout bèn, tout ounour, foundas uno famiho;
Que vòsti sentimen noun siegon pacoutiho,
Davans Moussu lou Conse e Mounsen lou curat,
Davans Diéu e ou mounde ounte anarés óubra:
Agi tout autramen es causo bèn marrido:
— Lou permés de l'Amour, es l'enfant plen de vido!

21 d'abriéu 69.

LAUSENJO AU CREATOUR

(*Danié III e Saume 148*)

Après soun óumenage au divin Creatour,
L'Ome, sa creaturo, en rèi, vòu qu'à soun tour
Touto causo qu'eisisto ou cèu e sus la terro
Bèn-digue dóu Segnour e lause quau óupèro.
Ansin presto soun amo à tout lou mounde entié,
Is esperit que saup e, ni court ni coustié,
A ço que vèi e toco. Acò 's un sacerdòci
Que se dèu à l'Autisme e qu'es un sant negòci.

Ansin li tres coumpan de Daniè, outre-tèms,
Escàpi dóu fournas, ravi, mai que countènt,
Cantèron dóu Segnour lou grand poudé, la glòri,
Que, sus de gros catau, ié baiè la vitòri.
Lis avien bateja d'un noum babilounian:
Sidrac, Abdenago, Misac. Em' éli sian:
— Ange dóu Segnour Diéu, cèu, armado celèsto,
E tout, sus lis auturo, ensèn fasès-ié fèsto.
Ensèn, benesissès, enauras lou Segnour.

Es un devé pèr vautre e i'a rèn de meiour!
Soulèu, luno, estelan, eigagno emai pluiasso,
E vous, tóuti li vènt, cadun faguès arrasso!
Fiò, calour de l'estiéu, glas e fre de l'ivèr,

Cadun benesissès lou Diéu de l'Univers.
Gelibre, nèu e glas, jour e niue, lus, sourniero,
Nivo, uiau e soun tron ensèn faguès cachiero
Au Noum de voste Mèstre e Segnour à jamai,
Dins li siècle di siècle, ansin e longo mai!
Qu'eicito-bas la terro e ço que ié figuro,
Colo, mountagno e vau, aubre, planto, culturo,
Sourgènt, riéu, flume, mar e vous, pèis estajan,
Bestiolo, aucèu de l'èr, benesissès tout l'an!
Bòni bèsti, ferun, e vautre, enfant dis ome,
Benesissès lou Diéu d'Israèl! Que se nome,
Se lause de pertout li juge, prince, rèi,
Li chato, li jouvènt e li vièi en desrèi,
Li sant e li noun sant, que tout, tout s'aprefounde,
Digue qu'es soubeiran, lou Segnour, sus lou mounde!
A larga sa puissanço au pople que i'es car
E, li siéu, pèr soun Noum farien bàrrí de car.
Au Paire emé lou Fiéu, l'Esperit que fan flòri
Siegon laus e ounour, benedicioun e glòri.

10 d'abriéu 69.

POUTOUN D'ENFANT

Un jour qu'anave en coumessiouun,
Rescountrère, dins la carriero,
De gènt; noun fasiéu atencioun
A si visage, à si maniero.

Lèu, veguère qu'èron crestian,
Car, subran, quitant sa meireto,
Gentamen me sautè davans
Uno poulido chatouneto.

Me vouguè faire un gros poutoun
A iéu, un vièi, mai en soutano;
Lou Sant Esperit, d'escoundoun,
Ansin mòu li cor e tresano!

Vaqui ço qu'es de noun avé

Di vièi prèire quita la raubo
Quau meno, lou pastre o l'avé?
Se counèis, soun vèsti, tre l'aubo.

S'ère esta mes coume un Moussu,
Em'uno vèsto e lòngui braio,
L'enfant noun aurié couneissu
Qu'ère un ome de Diéu en aio.

14 de mai 1969.

FAIRE LEVA L'AUBO

Excitabo auroram...
Saume 56, II

Coume lou gau dóu galinié
Se crèi de faire leva l'aubo
Emé si cant gai e proumié
En s'espóussant dedins sa raubo,

Ansin ma voues vers lou Segnour,
Tre que siéu esbaudi s'aubouro
Pèr dire li saume d'amour
Enterin que s'avanço l'ouro.

Pièi, quand lou soulèu es leva,
Car un jour nouvèu recoumènço,
Siéu tourna lèst, sèns m'entreva
S'aurai, au bout, ma recoumpènso.

Ai fe dins moun Diéu juste e bon
Que vèi quau l'amo e quau l'óubrido;
Se retèn de manda si tron
Contra li degaié de vida.

Vaqui perqué i'a de prega
Que sèmpre esvarte lis aurige
Dis ennebla, dis enfanga,
Tenènt comte de si nescige!

Car l'ome peco trop souvènt
Sènso pensa proun la maliço
De ço que fai contro lou bèn
De la Mouralo e la Justiço.

Diéu a besoun d'estre indulgènt
Pèr li fiéu d'Adam trepassaire,
Car li pùris amo autramen
Dins soun reiaume sarien gaire!

28 de jun 1969.

*À Moussu Rougié Joseph, Felibre de Lèiro,
amistousamen.*

UN ESCRÈT BONUR

Lou granjoun, lou maset o bèn lou cabanoun
Soun lis apelacioun d'uno souleto causo,
D'un raive legitime e moudèste de noum:
Urous quau, pèr l'ajougne e pèr n'en jouï, l'auso!

Avé sus uno terro, en foro de l'oustau,
Un clot de jardinet, emé de flour e d'aubre,
Un oustaloun cubert e barra d'un pourtau;
Pas besoun d'un castèu e que siegue de maubre!

Ié veni, lou dimenche o li bèu jour festiéu;
L'adurre lou manja se ié paisse en famiho;
Au printèms sobre-tout, e quouro usclo l'estiéu;
Se ié vèire en santa: vaqui la meraviho!

Vau miés que d'un cafè, lou dedins trafega,
Béure emé de coumpañ e faire de maniho;
La Naturo distrais sènso faire paga,
S'agis d'ama tout ço qu'en elo escarrobihò!

Jardina, s'acò plais, sougna liéume emai flour,
Acampa d'erbo utilo o bèn de cacalauso:
Esvarto, pèr un tèms, di peno la malour:
Vaqui l'escrèt bonur e l'eicelènto pauso!

Sant Enri, proche de Marsiho
9 de juliet 1969.

SANT LOUIS

Voudriéu de Sant Louïs vous charra'n prouvençau,
Car sabié lou latin, lengage universau,
E dous cop, en Pouvènço, em'uno armado forto,
S'embarquè pèr la Crous; èro au port d'Aigo-Morto
Tóuti li qualita di grand rèi e di sant
Lis avié e, de mai, que lou rendié puissant,
Aquel dòu gouvèr di pople de la terro.
Ero amourous de pas, mai redoutable en guerro.
Ço que faguè, jamai fuguè pèr ambicioun,
Mai lou bèn di crestian e de sa religioun,
Pièi l'ounour de soun Diéu, lis avié sèmple en visto.
De si crousado, ai! las! uno resulto tristo
Jamai entamenè soun renoum de bon rèi;
Subiguè lou mau-sort fidèu i sànti lèi.

Avié de quau teni: Lou rèi Felipe-Aguste,
Soun èire, de longs an, quaranto tres au juste,
Avié regi la Franço. Après éu, Louïs vue,
Soun fiéu, avié vincu, pas proun fort à sis iue,
D'Anglés e de Gascoun, pièi l'Albigés de cregne;
Mai èro mort trop lèu, après tres an de règne.
L'einat de si doulet just coumtavo douge an!
Nascu ou mes d'abriéu (1) douge-cènt-quinge, enfant,
Au castèu de Poissy, sa maireto acouchado
I'avié douna lou jour e peréu li tetado.

(1) Lou 25 d'abriéu

Blanco èro soun bèu noum, la chato d'Anfos nòu,
Rèi valènt de Castiho e Prince sènso pòu,
Qu'avié chapla, se dis, mai de cènt milo Mauro
E rendu lou travai à-n-uno regioun pauro.

Blanco, forço piouso e capabلو emé Diéu,
Se carguè dóu gouvèr e d'educa soun fiéu:
L'istòri, lou latin, l'art de faire la guerro,
De trata lis afaire e lou mounde coumo èro,
Aprenguè tout, parèis, e, tre qu'aguè douge an,
Fuguè lèu courouna dins Reims ou barbelant.
Ero urgènt! Dóu poudé, de Segnour avien fam:
Pensas! Un jouine Prince, uno femo à la tèsto!
Quento bello óucasioun de revòuto e de fèsto!
Banco lèvo l'armado emé soun fiéu jouinet,
Intro dins la Champagno e li Ligour soun nè.
Vouguènt tua lou rèi, Louïs se refugio
Encò de Montlheri ounte espèro en famiho
Que dinde à soun cadran uno majourita
Qu'affermira si titre e soun autourita.
Enterin que sa maire ispiro au jouine drôle
Lou respèt dóu santisme e lou suen de soun role:
— Amariéu miés, disié, vous vèire mort tant lèu
Que vous saupre coumetre un soulet pecat grèu.

Entre autre evenimen, que passan sèns daumage,
Blanco cerquè pér éu un noble maridage.
Pèr bonur l'atroubè proche de Fourcauquié,
Au castèu de Sant- Maime, à l'oumbro dóu clouquié:
Ramoun sèt, de Prouvènço, avié si quatre fiho;
Baiè sa Margarido au Rèi que vòu e briho;
Li tres autre, à-de-rèng, saran de Rèino, un jour;
La font di quatre Rèino a si rouman d'amour. (2)

(2) Louïs IX espouso Margarido; Carle d'Anjou, soun fraire, espouso Beatriço; Enri III d'Anglo-Tero espouso Eleonor; Richard Du de Cornouaio, pu tard Rèi di Rouman, espouso Sanche.

Es à Sens que Louïs d'en proumié la rescontro;
Eron tóuti d'accord e res ié faguè contro.
Maridage beni, lou vint-e-sèt de mai
Douce-cènt-trento-quatre, urous e longo-mai!
Pèr a pas encò siéu e lou bonur dóu pople,
Cinq an de tèms óubrè. Pièi, de Coustantinople,

Baudouin óufriguè (3) em'un tros de la Crous,
La Courouno d'espino en gage precious.
Lou sant Rèi acetè la douno forço bello
E boutè li relicle à la Santo Capello.
Pièi, contro ou blasfème e l'inmouralita,
Seviguè, bon crestian, de soun autourita.
E rendié la justico à cadun souto un roure,
Pèr acò, pas besoun i Palais d'ana courre!

(3) Baudoin II, Emperour de Coustantinople en 1239.

Ugue de Lusignan se rebello contro éu
E lou Rèi dis Anglés lou vòu lucha peréu.
Louïs es lou pu fort. Clamon cinq an de trèvo?
D'acord, en esperant l'aboundànci que lèvo.
Li crestian d'Ouriènt soun sèmpre mau-mena
Pèr d'orre Musulman. Eu, pènso de i'ana,
Mai uno malautié, grèvo, subran l'ataco
E sèmblo qu'un moumen dóu proujèt lou destaco.
Reçaup meme, pious, li darrié sacramen
E vaqui qu'es gari quàsi subitamen.
Alor, fai vot d'ana, segur, en Palestino,
Fai prègo à Sant Danis, canto laudo e matino,
Buto, l'espèdicioun, Blanco pren lou gouvèr,
Margarido seguis, tout lou mounde es en l'èr.
Lou vint-e-cinq d'avoust douge-cènt quaranto-ue,
S'embarco en Aigo-Morto ounte lou soulèu cue.
A Chypre, vaqui mai la pèsto que doumino;
Forço de si crousa cargon marrido mino;
Li Templié fan l'accord emé Jerusalèn
Ounte d'autri counfraire an coume éli de bèn.

Pièi, mando uno ambassado au Sultan, en Egito,
Pèr-fin que rèste siau; mai éu tourna s'eicito,
La luchó s'entameno ourriblo que noun sai,
Lou Sarrasin fugis e noun soup ounte vai...
Louïs passa, l'estiéu en vilo de Damieto;
L'abonde, lou rèn-faire es pas bono recèto!
La bataio repren emé li frai dóu Rèi; (4)
Lou Sarrasin requiéulo e mostro grand desrèi
Pièi, repren de courage e repasso à l'ataco.

(4) Carle d'Anjou; Roubert, comte d'Artès; Anfons, comte dóu Poitou, e Jan de quau sabèn rèn.

Carle d'Anjou es pres; Louïs vèn, lou destaco,
La pestilènci règno e soun pres tòuti dous,
L'armado qu'es valido es aro sèns secous.
A Damieto, la Rèino apren 'quelo desfacho,
Acoucho d'un garçoun, Tristan, de malafacho.
Lou Sultan, dóu deliéure, a mes si coundicioun:
Louïs se vèi fourça de faire soumessioun.
D'autant mai que de Franço ounte beilejo Blanco
Arribo soun rampèu. Vai pas bèn! Se n'en manco!
Cargo de chivalié de paga la rançoun,
Libre, repren la mar, meditant la leiçoun.

I'a sièis an qu'es parti, plen d'un mascle courage;
A subi de revès, de malautié, d'outrage,
A la voues de sa maire arribo enca lèu-lèu,
Quand, de soun enavans, noun beisso lou flambèu.
Un abat de Cluny lou reçaup à Marsiho
Sus éu e soun Païs la bono Maire viho;
Blanco a déjà parti vers li sants Aliscamps,
L'ispiro soun devé que coumplis quatecant.
Au castèu de Vinceno emé sa court arribo,
Revèi soun pople ami que, souvènt, es en gibo,
Fai soun mestié de Rèi. Em'aquéu dis Anglés
Trato pas ounourablo e trèvo, ansin tout fres,
Bèu-Fraire tòuti dous, urous de plus se batre,
Setèmbre douge-cènt emai cinquanto quatre.

Lou Cap di Mammelus mau-meno li cestian (5)
Tourna mai voularié pèr ié baia la man,
Après força consèu e sesiho malino,
Se decido tourna de courre en Palestino.
Es mai en Aigo-Morto ounte vai s'embarca
Emé de chivalié qu'à-n-éu soun estaca.
Se passè, la partènço, après Pasco, en setanto;
L'aubire de soun zèle un cop de mai espanto.
E vaqui qu'à Tunis, Louïs presto atencioun
Au Rèi d'aquest endré sinjant sa counversioun;
Mai es fous, es un las, Tunis es pas fisable
E règno dins li camp uno pèsto esfraiblo.
Sant Louïs, à soun tour, se sènt pres d'aquéu mau
E vèi que vai peri coume d'autre, es nourmau!

(5) Bondocdar

Reçaup li sacramen, prègo, fai penitènci,
Mostro à si chivalié soun umblo repentènci.

Li Sarrasin vincu avau faran la pas
E pèr dès an de trèvo. Es pas de trop ai! las!

Vaqui la tristo fin di darrièri crousado,
Davans Diéu e lou mounde un cop de mai pesado.

E Bounifaço Vue declarara grand sant,
Après la voues dóu pople aquest prince puissant:

Sant Louïs, toun Païs, es e rèsto la Franço:
Viho, prègo e la sauvo. Avèn de tu fisanco!

Vau-Rias, 4 d'avoust 1969.

TOUSSANT

Après un estiéu de fèsto,
L'autouono à regna s'aprèsto
E rènd l'ome mens foulas:
Tóuti li jour, en partènço,
Vèi de gent, de couneissènço.
Quitant tout, eicito-bas.

Di platano es la despampo.
La fueio, libro, s'escampo.
Es Toussant, fai marrit tèms!
Dins un mes, li branco bello
Retrairan de pregarello
Enjusqu'au nouvèu printèms.

Ansin l'ome, à soun tour, toumbo;
Sa despueio es messo en toumbo
E degun rèsto inmourtau;
Mai, dins l'en-delà, soun amo
Pèr ou cèu o pèr li flamo
Parèis au sant tribunau.

De que fai, alor, la Glèiso?
Pèr li vivènt, noun se tèiso;
Di sanciou mostro un tablèu
 E parlo di Benuranço
 Que nous baion l'esperanço
D'estre emé Diéu, tard o lèu. (1)

(1) L'espitro e l'evangèli de Toussant.

Pèr li mort, dis vèspro e messo
 Coumtant sus la countentesso
 A la justiço de Diéu;
 Tóuti li crestian d'acòrdi
 Pregon la Misericòrdi
 Pèr un perdoun noun tardiéu.

En retour d'aquest service
 Sian assegura d'óufice
 Qu'acò nous sara rendu,
 Car lis amo deliérurado,
 En Paradis benurado,
 Sabon quant nous es degu.

Coume soun recouneissènto,
Dóu miés èstre counsciènto,
 Pèr nautre, alor, pregaran,
 S'un cop sian, se nous aribo,
 D'estre enca que sus la ribo
 Dóu sant e divin acamp.

Es ensèn, dedins la glòri,
 Que lausaren la vitòri;
Es ensèn, dins l'estrambord,
 Que rendren à Diéu de gràci,
 A la Vierge, bèn en fàci,
 De tout aguènt lou record.

1968.

LOU FOUR DÓU BLOUNDIN

La porto dóu four a passa la porto
de noste Palais, dins Arle esmóugu.
Uno pèiro ansin, es-ti causo morto?...
— Rènd un óumenage au travai proudu!

Tre milo-vue-cènt e, de mai, quaranto,
mostro is lue vesènt la chifro dóu four.
Tres generacioun, lou Bloundin se vanto,
an óubra valènt, risènt pas toujour!

An pasta lou pan de mànti famiho;
éu pièi, lou pourtant tout caud e lusènt,
emé soun esprit, qu'èro meraviho,
ravissié li gènt tant èro plasènt!

Iéu, l'ai visto en plaça, estènt que vicàri,
vesitant l'ami fièr de soun mestié,
felibre d'elèi e dóu sa de gàrri,
disènt que mestié valié barounié.

E lou falié vèire en sa glourieto
tapissado qu'èro emé courtesié
de retrá d'ami, de milo carteto
de soun Felibrige o de fantasié!

Toujour en reservo avié quàuqui conte,
e jamai meichant pèr degun, se saup,
tambèn li chaland, ié reglant si comte,
óublidavo pas de bouta la sau.

Avié pres pèr femo uno Veisounenco (1)
que jamai, ai! las! ié baiè d'enfant.
Iéu, la couneissiéu coume chato unenco,
fuguè la tristour di Jouve s'aman.

(1) Damisello Enrieto Fabre.

Vuei, se ramentan aquelo memòri,
es en afecioun dóu despareigu;

es pèr ié largo quàuqui rai de glòri,
car, un ome ansin, ve! i'èro degu!

8 de setèmbre 1969.

DINS LOU MOUNDE

Venèn au mounde sènso saupre
tout ço que la tèsto pòu caupre;
acò vendra, dins quàuquis an,
à cha-pau, en se revihant.

Fau de tòuti pèr faire un mounde!
Lou vesèn, en esperit mounde,
quouro d'éu benefician
e qu'à neste tour óubrejan...

Cadun, sabènt dins so partido,
fai que tòuti menon sa vido
urous de la soucieta
que farié peno de quita.

Quouro codun fai bèn soun obro
de mestierau o de manobro,
dins lou mounde, alor, tout se fai,
tout se saup e même tout vai!

L'ome soulet noun pòu tout saupre;
se fiso is autre pèr reçaupre
ço que soun cors a de besoun,
ço que soun amo a de resoun.

Lou gènt, despièi la sajo-femo
qu'assisto à si crid e lagremo
enjusquo que vengue so fin,
usara di mestié vesin.

Que i'ague de la, de farino,
de lus contro l'escuresino

e de parènt pèr l'abari,
ié faire suen pèr noun mouri.

Après, trevara quauco escolo,
fara d'escourregudo folo
d'à-pèd, en veituro, en veissèu,
goustara lou bon e lou bèu.

Li Bèus-Art, s'un cop pièi lis amo,
lou chalaran sènso reclamo
d'ùni pèr la pousterita,
e d'ùni pèr l'eternita.

Maudira pièi li fabricaire
d'armo de guerro entre ome-fraire,
boumbo, granado emai fusiéu,
canoun, óubuso, sacrebiéu!
pèr se faire sauna tout viéu.

Se n'i'a que, davançant soun ouro,
se fan peri, li paure! es quouro
eicito soun trop malurous,
qu'an ges de fe ni de secous.

Pèr contro, lausara l'artisto
qu'esculto e fai pèr èstre visto
uno estatuo qu'a soun pres,
bèn encapado, sènso res.

Mai quau pènso i pu grand merite
de li que, ié saran pas quite,
esculton l'amo di jouvènt
pèr faire un sant d'un paure gènt?...

Sa glòri, dins un autre mounde,
faudra qu'un autre ié semounde,
sara neste Diéu soubeiran
que recoumpènso en abelan.

Diéu a tout poudé, touto sciènci
e ris de l'ome emé paciènci
quouro se crèi dis envencioun
e dóu gèni de sis acioun.

SUS TERRO

La Terro es à degun e cadun n'aprouficho,
Mai la planeto rèsto e lou mounde s'en vai,
Après n'avé jouï coume un rèi d'un palais,
Gramaciant o noun d'aquelo douno richo.

En quau es, quau l'a facho e quau, vuei, la mantèn?
— Lou Crist que dèu veni tourna-mai, santissime,
A la fin, pèr juja d'un biais soulennissime,
Li bon e li marrit ressuscita-vivènt.

L'artisto que, valènt, acoumènço un cap-d'obro,
Se l'acabo, noun saup quente sara soun sort,
Se l'estima vendra courouna sis esfors,
Se, d'asard, touumbo pas dins li man d'un fulobro...

Lis ome an de sounja d'un régime nouvèu;
Ié counsacron soun tèms, si sòu e si fatigo;
D'estre quicon de grand l'envejo li coutigo
Enjusquo que la mort, zóu! li bouto au toumbèu.

Oubra pèr lou prougrès es uno bono causo,
Oubra pèr un miés éstre es, de téuti, l'espèr;
Vaqui perqué, de-fes, se chanjo de Gouvèr
E « tout nouvèu, tout bèu se coumpren e se lauso.

La Terro a de dura, mai peréu de chanja
E viro, eicito-bas, la figuro dóu mounde.
Quant de revoulucion an pas baia l'abounde,
Leissant lou paure pople encaro endaumaja!...

Uno souleto causo es, pèr téuti, pariero:
Es lou besoun d'argènt e, dounc, de n'en gagna
De quente biais que fugue e se pesque ounte n'i'a,
Mai noun dèu èstre Mèstre e la buto darriero.

L'IÈLI

De flour soun à l'autar qu'es riche e tras que bèu;
Sèmblo un trone reiau forço mai qu'un toumbèu.
Pèr Diéu, soun Creatour, li flour adornon, vihon;
Si formo, si perfum, si coulour meravihon.

L'iéli, dintre li doun, doumino majestous.
Es un signe de fe, d'amour, es de bon goust;
Si petalo an d'acò de la ciro moudèsto,
Envóuton de poun d'or que reausson la fèsto.

Calice naturau que noun s'es enventa,
Es bèn, l'iéli, la flour de la divinita
Quand, pèr la Fèsto-Diéu, lou jour que s'adévino,
Se vai, dins li jardin, n'en prendre ounte a racino.

Es juste, digne, bon que, pèr lou Creatour,
Se porge li bouquet de coulour, de sentour,
Subre-tout se, de mai, li sentimen de l'amo
Valon miés que la prègo ounte just se reclamo.

Au bèu tèms que renais, ournamen agradiéu,
L'iéli di rèi counvèn à la Vierge, au bon Diéu.

Abriéu 69.

NÒSTI VUE CROUS

Pourta vue crous sus sis espalo,
Naturalamen fai susa!
N'en soun alassado e pourpalo,
Quouro lou fais es mal-eisa.

Que siegue Canounge o Mounsegne,
Que fugue chato d'un valènt,
Avèn tóuti besoun que degne
Nous ajuda, l'Ounnipoutènt.

Es que n'auren vist, dins la vido,
En regardaire emai atour!
Mant cop, verai, s'es abourrido
Talamen qu'èro en desfavour!

Li meiour moumen, lou fau dire,
Fuguèron li de l'amista,
Quouro, ensèn, amavian de rire,
De tout, de rèn, mai en santa.

A Diéu devèn rèndre de gràci,
Car es Eu que nous a sousta
Quouro lou malur, dins l'espaci,
Viravo de neste coustat.

Oublidén pas la Santo Vierge
Emai li sant, nòstis ami;
Pèr éli cremaren de cierge
Davans que l'on s'ane endourmi.

Quouro vendra l'ouro darriero,
Fuguèn urous d'avé viscu
De te crestiano e de preguiero,
Pièi, de parti, n'en poudènt plus!

Lou Flourege, aquelo famiho,
Nous embouniguè proun de cop:
Reçaupe li merci de trò
Lou Cabiscòu que sus éu viho
E que vuei, nous ounouro trop!

Lou mai de tèms fugue pouossible
De garda lou bon Cabiscòu
Que tout lou mounde amo accessible,
Que lou Flourege estimo, e vòu,
Que lou destin penjo à soun còu!

APOUNDOUN

Festejan enca la cigalo
De Mèstre d'Obro atravali
A Misè Milhaud, que se chalo,
A Segne Rebière, embouni.

Fan ounour, se saup, au Flourege,
Longo-mai li veguèn óubra
Pèr-fin que noste group eigrege,
Pèr-fin qu'en Cap fugue auboura!

29 de mai 1969.

LA BÈUTA MAJO

*Domine, dilexi decorem domus tuae
et locum habitationis gloriæ tuae.*

Saume 25

Anave, lou cor trist e tout ablasiga:
D'aquest mounde marrit enfugi la trevanço
M'aurié pas desplaigu, car sentiu la grevanço
Que m'avié fa quaucun pèr lou mau afouga.

Aviéu proun assaja de counfourta moun amo
Dins l'amista de Diéu, de la Vierge peréu;
Lou cop dóu faus coulègo èro encaro trop viéu
E, dificilamen, troubave la calamo.

Es alor qu'enregant l'intrado dóu Sant Liò,
Fuguère pivela pèr de causo admirablo:
Esculturo, pinturo e richesso increvable,
Li mabre e bos daura rebatant milo fiò.

Tout, d'uno autre bèuto, me diguè l'eisistènci:
La vostro, Segne-Diéu, de quau belan li tra.
Noun falié, de segur, eici l'escalustra:
Rèn es proun riche e bèu, marcant vosto presènci!

CÈU DE CHAVANO

La chavano s'adus, peniblo es l'atmousfèro;
Lou tron s'ausis, alin; un gros vènt fai soun trin
Que boulego lis aubre, alor qu'entanterin
De gros degout, déjà, toumbon dessus la terro.

Lou soulèu s'acatant fai que la lus palis;
Es escoundu, subran, pèr un ridèu de nivo.
Zóu! mai! de gros degout plóuvon, fan la salivo;
Dóu sòu, qu'èro pas fre, l'óudour mounto e feblis.

I'a de boulegadisso, encaro, dins li branco:
Un brut luenchen e sourd s'entènd, pièi disparèis:
Vai chanja de quartié, quitant res en desrèi,
La chavano esperado e que jogo de manco.

I'a, dins li relacioun, d'escabissous moumen.
Sèmblo que vai peta lou tron d'uno coulèro
Enemigo, se saup, d'amour, de pas sus terro:
Mutés pas! Fagués rèn, franc d'un sourrire, Amen!

RÈI DE LA CREACIOUN

Aubre, insèite, flour, aucèu,
Qu'adournas faste vièti mounde,
Pèis de mar que, di veissèu,
Se pescon en bèl abounde.

Pèiro, roucas, animau
De tout péu, de toutó meno,
Couneissès ni bèn, ni mau,
Senoun l'Ome que permeno.

Au service d'aquest rèi,
Sias fidèu à vosto astrado,

Jamai trasgressas li lèi
Que, sus vautre, soun pausado.

Noun óufensas lou Segnour,
En tout seguissès sa rego,
Soul, contra soun Creatour,
L'Ome libre peco e prego.

Pamens es ama de Diéu,
Crea qu'es à soun image,
Pousquen noun i'estre agadiéu
E ié refusa l'óumage.

Mai quouro es óubeissènt
A si lèi e s'umelò,
Lou Segnour en éu descènd
Dins sa diva Eucaristò.

E la Santo Ternita
Viéu aqui dins sa courado
Fin-qu'au jour ounte, arresta,
S'en vai, l'amo benurado.

LOU BON E LOU MARRIT

Dins lou courrènt de la vidasso,
Quau noun a beneficia
De la sciènci founso e grandasso
Qu'an aquisto d'esprit que i'a?...

De mai, proufichan dis artisto
De quau li cap-d'obro amiran
Chalon l'ausido o bèn la visto
E, naturau, acò trouban.

Saut quente regime que naisse,
L'Ome se fai à soun Gouvèr
Mai que posque viéure, se paisse;
De sèntre un merci n'a pas l'èr.

Mai, que sorte un supost dóu diable
Pèr treboula l'ordre, la pas,
Se mau-dira coume eisecrable
Pèr lis escàpi dóu trepas.

Soun noum, grava dins li memento,
Sara coume aquéu de Cifèr,
Car, malamen, dins la tourmento,
A fa de la terro un infer!

LA NEGLIGÈNCI

Es un manco de suen emai d'aplicacioun,
O bèn d'eisatitudo au sujet dis acioun;
Se neglijo l'estile e lou vièsti ounourable,
Un devé de paga, quauque mau supourtable,
L'ouro d'uno partènço e l'ouro d'arriba,
De remounta sa mostro e d'aganta li rat,
De coupa lou courrènt dóu gaz o bèn dóu lume,
D'embarra sis afaire e si voulé poustume;
D'escriéure emé grand suen soun radié testamen,
Subre-tout de prega, quouro n'es lou moumen!
Léugiereta d'esprit o puléu feiniantige?...
Gardas-me, Segne-Diéu, que li causo neglige!
Lo resulto d'acò es amaro, souvènt;
Quouro es plus lou moumen, alor, se pòu plus rèn
Que subi de l'óublit uno peno cousènto.
Dóu devé fau segui la rego benfasènto.
A tout neglegimen, garo, cade matin!
Ansin sarens segur de pas manca lou trin.

L'OME INUMAN

Homo homini lupus
Plaute, Asinaria II, 4, 88

Aro, que l'ordre regno e qu'avèn plus de guerro,
Veguen quènti moubile animon lis uman
Pèr escampa ou sang d'ome-fraire, sus terro,
Quouro i'a proun de large e d'obro pèr li man:

S'es vist un assassin despièl li proumiés ome,
Dins lou crime buta pèr uno jalousié
Contro Abèl, lou mignot, autant vau que se nome;
D'autre, après, soun neissu qu'an tambèn fa parié!

De sentimen d'ourguei, d'ambicioun e d'envejo
An fa mounta d'assaut contra de poussessour;
E la lèi dóu pus fort vaqui que segnourejo:
— Dóu dre l'on se n'en trufo, i proutèsto sian sourd!

Li fanatisme, après, de muertre soun l'encauso:
Impausa sis idèio e lou culte à soun diéu!
S'es vist, dins lou passat, fasènt d'ourriblo causo
E de martir, tambèn, que soun esperit viéu.

Emai, coume resoun, i'a enca la poulitico,
Lou partit que vòu vincré e doumina soulet.
Di liberto di gènt se n'en trufo uno clico:
— Siegues di nostre o bèn te fau coume i poulet!

S'atrobo encaro, pièi, la gratuito ahiranço
Contro d'uman de quau la raço counvèn pas.
L'on vòu la supremi, n'en avé deliéuranço,
Ié rauba ço qu'es siéu, contro elo l'on se bat!

Quant de gènt, desempèi que lou mounde despènso,
Pèr lou ferre o lou fiò, malamen, an peri!
De tua soun prouchan, Diéu avié fa desfènso,
Mai s'atrobon toujour d'escampo pèr agi!

Avèn pas proun, eicito, un fuble de misèri
Fau encaro lou flèu di crudèu, moi que d'un,
Qu'an rèn coume pieta, qu'en mai di vitupèri
An lou goust de se batre e d'espóuti quaucun!

Pèr predica l'amour a d'obro nostro Glèiso
Fin-que vèngue la pas, de pertout, entre uman!
L'Autourita, de-fes, em'elo noun se tèiso,
Mai la bello resulto es enca pèr deman!

LA DESTINADO

— Quand sagras grand, de que vos faire,
Quaucun, à l'oustau, me disié?
Entrepacha, lou sabieu gaire:
Me plaisirien tóuti li mestié.

Travai di man o bèn de tèso,
A-de-rèng, faguère li dous.
Ero pancaro uno batèsto,
La vido, e viéue èro plus dous!

Pièi, esperave de bèn saupre
Ço que Diéu, enfin, me voulié
Fin-qu'au jour ounte, coume un caupre,
D'estre prèire aguère foulié.

Se dis que touto vido umano
S'endevèn em'un plan divin;
Pèr lou grand noumbre, es la proufano,
Cadun avèn neste destin!

Diéu renjo tout à soun idèio
E mòu meme li voulounta
Pèr-fin qu'amount, dins l'empirèio,
Soun mounde siegue counquista.

— Soun pas miéuno vòsti pensado,
Vòsti camin soun pas li miéu,
Dis lou Segnour. Que, bèn passado,
Vòstis ouro fugon de Diéu!

La questioun majouro es de faire
Ço qu'es dins nosto youcacioun,

Segur d'estre urous, de noun traire,
Sus nautre, la maladicioun!

Quau agirié d'un biais countràri
A ço que Diéu pènso emai vòu,
Sarié perdu, paure aversàri,
E menarié sa vido en fòu!

Quente es a vostro, car legèire?
Sias-ti dins la draio dóu cèu?
Avès, s'amoundaut voulès sèire,
De segui li sage counsèu.

Au paradis, es uno plaço
Qu'avèn d'ajougne à tiro péu;
Se la mancan, causo tristasso,
Poudren pas n'en acusa Diéu.

Car nous meinajo, eici, si gràci
Pèr coumpli noste sauvamen;
Aproufichen-n'en, car sa fàci
Nous espèro, benuro: — Amen!

TEBESO D'AMO

Emé Quau a vougu li forçò de ma vida
D'ounte vèn qu'ai pas mai d'intìmi relacioun?...
Vén-ti d'Eu o de iéu, manco de devoucioun?...
Sus acò, baias-me, Segnour, quauco esclargido!

D'ounte vènon frejour e manto escuresino,
D'esclùssi de moun Diéu qu'ame, pamens, de cor?...
N'ai de peno profoundo e, senoun lou decor,
Que vèngue, tourna-mai, la sentido divino.

De gènt que i'aurié fa sacrifice parié
Me n'en sarien devènt, lou crese, en recoumpènso.
Agués pieta, Segnour, de ma vivo soufrènço,
Digas-me ço qu'enfin, vuei, me counsularié.

Sounjas qu'es pèr amour qu siéu voste apoustòli,
Qu'à vous sèmpre servi siéu dins la Glèiso, encuei;
Coume vai que siéu las e qu'ai lou negre, vuei?...
Dins l'engranage miéu venès metre un pau d'òli!

Iéu, qu'à l'amour uman, sabès, ai renouncia,
S'aquéu de moun Segnour es pas moun emandanço,
I'a de que se lagna, même avé de doutanço,
Jèsu, lou coumprenès, n'en siéu tout trefacia!

Jèsu:

Se noun te siéu sensible, ami, l'esprovo óupèro...
Me cercariés pas tant s'ère pas, iéu, en tu!
Dins aquel estamen se mostro a vertu:
Es bàn mai meritous lou fidèu à l'espèro!

Se, tu, te siés douna, me siéu liéura peréu!
Pèr tu me siéu fa l'Ome, ai establi ma Glèiso,
Ai subi ma passioun, la Justiço se tèiso,
E siéu mort sus la crous, cridant au Paire miéu.

Quand te siés revela, t'ai ourdouna moun pèire;
Desenant moun ami, t'ai larga de poudé,
Rèsto moun digne aposto e sèmpre à toun devé,
Vendra pièi lou moumen qu'amoundaut poudras sèire.

Lou reprengues dounc pas, toun cor que m'as quita.
Change pas ma paraulo, un cop de mai, lou clame!

Lou disciple:

Lou sabe, Segne-Diéu, e, pèr acò, vous ame.
Siéu vostre, gardas-me pèr nosto eternita.

ESPERITALO COUQUETARIÉ

Crestian, quau m'aurié di qu'uno couquetarié
Prenguèsse, un jour, de prèire emai de religiouso!
Bèn marca, pourta bèu, noun èstre li darrié
Dintre lis ufanous que sa visto embelouso!

La soutano e o raubo èron d'austerita,
De vièsti qu'èron pres coume de penitence:
An agu permessioun de pousqué li quita:
— Zóu! Zóu! bricoulen pas, an di, sèns repentènci

— Ai proun de sòu, ma fe! pèr pousqué me paga
Un bèl abit de drap encapa sus mesuro.
Li counfraire saran pas trop estoumaga
E faran coume iéu, avèn memo naturo!

Coume, s'èro pas'cò, esplica lou mouloun
Dis abat tras qu'urous de moustra d'abit d'ome
E qu'en fube en carga de tuièu-pantalon,
De vèsto, de gilet parié que d'astrounome?...

Li fidèu soun pas'sta counsènt, en generau,
An regreta dòu bon ço que li destingavo
E, s'éli se soun vist emé gau au mirau,
Noun an edifica quantita d'amo siavo.

E pièi, de religiouso, an tambèn decida
D'avé la tèsto nuso, e sa cabeladuro
Es frisado emé suen, e si péu poumada
Fan un efèt, parbiué! miés que de miniaturo!

De raubo de coulour an cargado emé goust
E, de si coutihoun, s'es accourchi l'estofo,
E se veson boutèu e debas gris o rous
Coume lis àutri femo. Adiéu, li vièii cofo!

Quento necessita d'un parié chanjamén?...
Se saup e se dis proun: — L'abit noun fai lou mouine!

Mai marco is iue di gènt un grand destacamen
Di beloio d'eici, siegués-ti vièi o jouine.

De mai, marco enca miés l'estacamen prefound
A Diéu em' à la Glèiso, au mitan di proufano.
Perqué plus èstre ansin? Vese ges de resoun
O puléu la resoun que s'esvarto e s'engano!

Dins lou mounde ounte sian, e pèr lou counverti,
Voulountié óubrarai, quand dins éu fau que sorte;
Mai rèste ço que siéu, prèire de Jésu-Crist,
E vole faire ounour au sant vièsti que porte!

Fin d'óutobre 1969.

FAIRE DE NÒU

Nil novi sub sole
Salomon, Eccles I, 10

Couneissès, de segur, la ràbi de l'epoco,
Ràbi qu'a pres li jouine e li tèn coume un flèu,
Ràbi qu'a pres la Glèiso en ço que nous pertoco:
— Voulèn de chanjamen! Fau faire de nouvèu!

La resoun? — N'avèn proun de vòsti vièii modo!
Au siècle di teinico es uno evolucioun.
De nouvèlli coustumo an d'èstre miés coumodo.
Li machino soun rèino, espagnon, si founcioun!

Dire que lou passat n'avié rèn de valable,
Es un arroungantige, es uno grosso error!
Avèn óubra, viscu d'un biais tras qu'ounourable
Fasènt ço que poudian, cadun, jour après jour.

Dins li tèms atuau, jouine, jougas de manco:
De que nous adusès e que vale l'ancian?
Vesèn qu'un pale esfors, mediocre en touto brancho,
E lou charpin nous prèn de vèire ounte n'en sian!

Que siegue dins li letro e la literaturo,
Ço que parèis noun vau nòsti moussèu classi;
Se, dis escri proudu, passan à la pinturo,
Li vièi mèstre d'antan fan primo, enjusqu'eici.

S'aro, bràvi jouinet, abourdan la musico,
Lis autour d'aro, anas, riscon rèn de trachi!
Di vièi siècle escoula la tiero simpatico
A baia lou meiour que n'en sian enrichi.

E pièi, mandant lis iue sus nosto architeituro,
Vaste ciment arma noun se pòu coumpara
Emé li glèiso e lis oustau de pèiro duro
Desfisant li sesoun, dins d'estile embarra.

Se, dis art, passan lèu à dire sus la modo,
Di jouine di dous sèisse, alor, es carnava!
E carnava tout l'an! Paris buto à la rodo.
Lou bèu rèsto d'aièr, coume s'èro atrouva!

Fau tambèn de nouvèu dins nosto Glèiso santo!
Parèis qu'es quasimen uno necessita!
Pamens s'es proun fa d'obro, cutre-tèms, e marquento!
Vuei, es en criso e zóu! i'a fam de nouvèuta!

Nautre, peréu, li vièi, sian de trop, nous fau crèire!
Avèn de tout quita, de leissa li jouvènt!
Faran miés que nous autre emai que nòsti rèire?...
Veiran, quand saren plus! Se dira, l'on que vèn!

Tout ço qu'avèn viscu, nosto sajo esperiènci,
Tout ço qu'avèn apres au trafé de longs an,
Acò, noun comto plus, e la nouvello sciènci
Dèu reüssi bèn miés. Bono chanço! Veiran!

CANT DÓU FLOUREGE

Refrin:

Flourejian, garden toujour
Nosto lengo dóu Miejour. (bis)

1

Avignoun se lou rapello
Qu'assoustè li Primadié,
Quand la lengo sobre-bello
Gràci n'éli revivié:

2

Dins si bàrri, Roumaniho
Emé Mistrau, bèu proumié,
Avisèron li famiho
Que soun parla flourissié:

3

Aqui mai lou grand pouèto,
Aubanèu, cantè lou Bèu;
Eron pas de belugueto
Sis escri, mai de flambèu:

4

Jan Brunet, lou flame pintre,
Ié visquè de soun talènt,
Dins lou roudelet fau qu'intre
Pèr óubra coume un valènt:

5

Li Giera, dins sa carriero,
An leissa de souveni,
Encò d'éli, pas darriero,
Zani devié ié veni:

6

Tavan quitavo Gadagno,
Li frisoun, soun Camp-Cabèu,
Pèr s'empura en coumpagno
Di troubaire tout nouvèu

7

Anséume Matiéu, bèu drôle,
Ero l'Oste di Templié;
Sarié 'sta puléu soun role
D'estre un prince de foutié:

8

Coumplimen au fiéu d'Irlando
Qu'en Avignoun a viscu
De coutrìo emé la bando,
Largant si parpaïoun blu:

9

Laus, aounour, estimo grando
I bèu davancié d'elèi
Qu'au Flourege an fa mirando,
Qu'avèn de segui si lèi:

LA COUPO

(Sus l'èr de Carle Gounod: Le roi de Thulé)

I

Ero un rèi mai descounoula
qu'enjusqu'à la fin de sa vido
fidèu à sa rèino partido
d'elo avié, d'or escrincela,
uno Coupo, record de femo (bis)
i jour festiéu, se n'en servié,
e, chasque cop que ié bevié,
sis iue s'emplissien de lagremo.

II

Quand sentiguè veni la mort,
enfregi mounte l'on s'ajouco,
pèr l'auboura fin-qu'à sa bouco,
si dos man faguèron l'esfors.
E pièi, en l'ounour de sa Damo (bis)
un darrié cop, piious, beguè:
La Coupo i det trefouliguè,
pièi, pausadis, rendiguè l'amo.

III

Sian d'amourous, nautre tambèn,
que bevèn à la memo Coupo;
un sant fremin nous agouloupo
quand sounjan en quau lou devèn:
Lou devèn à nosto Coumtesso (bis)
i Primadié, i Catalan:
Qu'un zèle franc sèmpre abelan
nous tengue uni sènsò treitesso!

25 de mai 1955.

PATRÌO

PAURE MARTIR ESCUR (Reviraduro)

Musico de Paladilhe

Paure martir escur, eros umble d'uno ouro,
Iéu te salute e moun cor plouro.
La legèndo aprendra toun noum e lis enfant
Sèmpre counservaran ta memòri benido,
E reviéuras, ô tu, que dounères ta vido
Dintre li pu valènt e li mai triounflant;
Vo! reviéuras, ô tu, que dounères ta vido.

Noun es pas de toumba dins la lucho acarnado
Que fai grando uno destinado:
Es de peri fidèu au mot d'ordre aceta;
Es de coumpli dins l'oumbro un noble sacrifice;
D'ana toujour, segur, fin d'acaba l'óufice
E de s'espera rèn de la pousterita;
Es de coumpli, dins l'oumbro, un noble sacrifice!

P.C.C.
Enri GEORGE,
1969

**Viraduro de “*Le temps des cerises*“ de J.-B. Clément
pèr li paraulo e musico de A. Renard, de l'Oupera**

I

Quouro cantaren ou tèms di cerièiso
E gai roussignòu e merle trufet
Tóuti faran fèsto!
Li bello n'auran lou foulige en tèsto

E, lis amourous, soun cor en caufet!
Quouro cantaren lou tèms di cerièiso,
Siblara bèn miés lou merle trufet.

II

Mai es proun courtet lou tèms di cerièiso
Ounte anan pèr dous culi sounjarèu
De pendènt d'auriho...
Cerièiso d'amour que jamai varìo
Toumbant sout la fueio en rouge parèu...
Mai es proun courtet lou tèms di cerièiso,
Pendènt de courau culi sounjarèu.

III

Quouro n'en sarés au tèms di cerièiso,
S'avès pòu, de-fes, di charpin d'amour
Fugissè s li bello!
Iéu, que cregne pas li peno crudèlo
Sènsou rebouli noun viéurai un jour;
Quouro n'en sarés au tèms di cerièiso,
Vous tambèn aurés de peno d'amour!

IV

Iéu, sèmpre amarai lou tèms di cerièiso,
Car es d'aquest tèms que garde en moun cor
La plago duberto.
E Dono Fourtuno en m'estènt óuferto
Noun pourra jamai gari moun record.
Vo! sèmpre amarai lou tèms di cerièiso
E lou souveni que garde en moun cor.

P.C.C.
Enri GEORGE
1968

**Versioun dóu Nouvé de l'Irlandeso Augusta Holmès
(1857-1903)**

TRES ANGE A-NIUE...

I

Tres ange, à-niue, (aièr) me soun vengu
Pèr me porge de bèlli douno:
D'un encensié, l'un, esmóugu,
L'autre, avié de roso en courouno
E lou tresen pourtavo enfin
Uno roubo, uno meraviho,
Floucado d'or, de jaussemin
Coume n'a Madamo Marìo:
Nouvé! Nouvè! Arribon dóu cèu
Pèr t'adurre çò que desires,
Car lou bon Diéu,
En tout agradiéu,
Es pas gai, quouro tu souspires.

II

Vos-ti lou flame encensié d'or
O la rosó que te reviho?
Vos-ti la raubo o lou tresor
D'un coulié ounte l'argènt briho?
Vos-ti de fru paradisen
O de blad di celèsti raço?
Coume li pastre, à Betelen,
Vos-ti vèire Jèuse en sa jasso?
Nouvé! Nouvè! Entournas-vous-en,
Mi béus ange emé çò que clame:
Encò dóu siéu, Demandas à Diéu
Lou bonur
pèr lou que iéu ame!
pèr aquéli qu'ame!

MIEJO-NIUE, CRESTIAN!

I

Es miejo niue, Crestian, l'ouro soulenno
Que l'Ome-Diéu fin-qu'à nautre es vengu
Pèr escafa di vièi parènt la peno
E de soun Paire amourtí lou degu.
Lou mounde entié tresano d'esperanço,
Aquesto niue ié baio un Diéu d'amour:
Pople, à ginoun, reçaup ta deliéuranço!
Nouvé! Nouvé! Veici lou Redemptour! (bis)

II

De nostro fe que la lumiero santo
Tóuti nous mène au brès dóu bél Enfant,
Coume àutri-fes l'estello esbrihaudanto
Ié counduguè li tres cap dóu Levant.
Lou Rèi di rèi nais dins uno umblo jasso;
Catau de vuei, fièr de vosto grandour,
A vaste ourguei, Diéu parlo e noun s'lasso:
Clinas li front davans lou Redemptour. (bis)

III

Lou Redemptour a roumpu lis enfèrri;
La terro es libro e lou cèu es dubert.
Vuei, se frairejo ounte èron vitupèri,
L'Amour unis li countràri d'aièr.
Quau ié dira li merci de la Franço!
Pèr nautre nais, soufris e mor d'amour:
Pople, estènt dre, redis ta deliéuranço:
Nouvé! Nouvé! Canten lou Redemptour! (bis)

CANTICO À NOSTO-DAMO DE LOURDO

1

Dins aquest liò de nosto Franço,
I'a d'acò cènt e quauquis an,
Venguères emé benuranço
Adurre un sourrire abelan:

REFRIN

O Vierge de Lourdo,
Que siés jamai sourdo
Is “Ave“ pious d'un pople devot
De quau se prouclamo
Tout tiéu, cors e amo,
Escouto la voues, coumoulo li vot.

2

L'idèio d'aquelo vesito
Fusè de toun cor meirenau;
Un cop de mai, vesèn aquito
Que prènes suen de nosto nau:

3

Entre-vesiés li gràndi guerro
E si vitimo que Diéu saup;
Sabiés que pertout, sus la terro,
Contre la fe i'aurié d'assaut.

4

As dounc chausi pèr èstre visto
Uno umblo chatouno d'elèi;

Dès-e-vue cop, favour requisto,
Toun rendès-vous fuguè sa lèi.

5

Pièi, l'as fisa, dins toun message,
Ço que falié pèr nous gari:
D'abord, que fuguessian pu sage
Pèr, santamen, viéure e mouri.

6

Faguères sortre uno aigo vivo
Pèr n'en béure e se n'en lava;
Lou mounde crestian se i'abrivo.
Qu'es miraclouso acò's prouva.

7

Enfin, vouliés uno capello
Ounte vendrian en proucessioun;
De baselico tras que bello
Te marcon nostro devoucioun.

8

An courregu de-vers ta baumo
Dòu mounde entié li catouli;
Lou sobre-naturau embaumo
Si cor amaire enfestouli.

9

An couneigu milanto esprovo:
Dòu, rouino, eisil, fam, malautié;
Si faus bergié i'an fa la provo
Que li segre es marrit mestié.

10

Bèn mai qu'alon, sus nosto terro,
Li pople soun desvaria;
Coucho luen d'éli l'orro guerro,
Respond is “Ave Maria“.

11

Sauvo-lei di pouliticaire
Que li desviron de toun Fiéu;
Fai leva de bon semenaire,
Enfioco lis ome de Diéu.

12

Bèn mai qu'alon, de toun sourrire,
Lou mounde d'aro a grand besoun;
Espandis-lou! Posque se dire
Que, de tu, tèn sa garisoun.

13

E, se la foulie rèsto encaro
Pèr un empéri de Satan,
Gardo pèr tu l'armado caro
Di bon crestian que t'amon tant!

14

O tu, qu'en lengo dóu terraire
As bèn vougu te faire ausi,
Dóu même biais, ô bono Maire,
Te pregan de nous benesi.

1958

La musico encò de l'autour.

AVE, MARIA!

Li Sant e lis Ange
En cor subre-bèu
Fan vòsti lausange,
O Rèino dóu cèu.

Refrin:

Ave! Ave! Ave! Maria (bis)

O Vierge Mariò,
Dous es vaste noum,
Sias la meraviho
Que bouto à ginoun.

Coume i tèms antique
Lou cantè Grabié,
Que moun cant esplique
Pèr vous ma foulie.

Davans vaste image
Vegués que d'enfant,
Agradas l'óumage
De tóuti sis an.

Fugués un refuge
Pèr lis endeca,
O maire dóu Juge
Que saup li pecat.

Luen de sa Patriò
Menas lou sóudart,
Sus éu sèmpre viho
Voste bon regard.

Dóu paure que plouro
Ausissès li vot,
A la darriero ouro
Que parte en devot.

Vous de l'innoucènci
L'amable soustèn,
Fasès diferènci
Emé quau noun tèn.

Vierge, sout vosto alo,
Urous quau s'endor,
So nau prouvençolo
Aboutigue au port.

Fugue sauvo au port!

FUGUES NOSTO RÈINO

Sur l'air “Chez nous, soyez Reine“

Fugués nosto Rèino,
Sion téuti pèr vous;
Se rèn, eici, vous gèino,
Demouras- nous!
Fugués la Madono
Que bouto à ginoun,
Que souris tutto bono
Dins lou perdoun.

1

Sias bèn la tutto bello
E la Rèino dóu cèu
Que la lus enmantello
Dins ou divin Counsèu.

2

Sias bèn la tutto amablo,
L'espèr di pecadou,
Fugués-ié favourabلو
Emé lou Sauvadou.

3

Sias bèn la touto puro,
L'estello dóu matin,
Que coucho la sournuro
De mai que d'un destin

4

Pèr tòuti sias la Maire
Pas rèn que dóu Sant Crist,
Alor, pèr vous coumplaire,
Faren ço que nous dis

BROUNDIHO

D'utileta publico

— S'un cop barras de glèiso, alandas de presoun!
L'a di, sabe plus quau, emé forço resoun!
De mai, aqui dedins, quant de peno assoulado,
Quant d'isagno foundudo e de fe counfourtado,
Quant de desi pas bèu an vist sa garisoun
E quant de febleta se soun reviscoulado!
— S'un cop barras de glèiso, alandas de presoun!

Saume de Dàvi (13,1)

— Lou ges de sèn a di: — I'a ges de Diéu
E si parié, esclau nèsci dóu diable,
Se soun gasta, que mai desagradiéu,
An pres de goust, de mour abouminable.

N'en sabe ges que fague un pau de bèn,
Pas meme-v-un, de-fes, pèr escasènço.

Quau la vèi e quau l'a visto

T'ai couneigudo mourvelouso,
Vestido coume li boumian:
Ta bèuta, vuei, nous embelouso,
Siés femo à rèndre pantaiant.

O tu qu'aro siés tant poulido,
Aviés la tèsto empevoulido,
Aviés lou mourre mourvelous!
Aquest record es pas trop blous!

Dire de cat

Dins qunte siècle, aro, vivèn!
Lou mounde, ai! las! de que devèn?...
Nous an barra li catouniero,
Mai nous an bèn leissa li niero.

Fidelita

Fau coume lou bon Diéu, abandoune li gènt
Que s'éli, bèu proumié, noun fidèu m'abandounon.

Dèstre divin

— Tira lou bèn d'un mau, soulet, Diéu, qu'es un mèstre,
Lou fai secretamen, n'aguènt lou biais, lou dèstre.

Contro li fèsto de niue

Pèr-fin que l'ome se pausèsse
Lou Creatour faguè la niue.

Traitesso

Dis enemi lou verin nous fai rèn,
Mai, dis ami, triste e malaut nous rènd.

Radicalisme

Se saup que la passioun laïco
D'uno pagano Republico
En forço gènt
Lèvo lou sèn.

Cregnènço

Au tribunau divin, me vese, un jour, parèisse:
De que dirai, alor, grand pecadou que siéu?...
Me sèmblo que dirai — Perdoun! Pieta, moun Diéu!
Tout ço qu'ai fa de mau, ai! las! lou recounèisse.

Que de bouco e pèr escri
Siegue lausa Jèsu-Crist!